

KERATAN AKHBAR

TARIKH : 21 OGOS 2024
AKHBAR : BERITA HARIAN
MUKA SURAT : 2

Tiga tonggak perlu sepakat jayakan PuTERA35



Minda Pengarang

Tiga tonggak perlu sepakat jayakan PuTERA35

Pelan Transformasi Ekonomi Bumiputera 2035 (PuTERA35) dilancarkan Perdana Menteri, Datuk Seri Anwar Ibrahim, menandakan satu lagi langkah penting dalam usaha memartabatkan ekonomi Bumiputera. Pelan bertemakan 'Penyertaan, Pemilikan dan Penguasaan (3P) Bumiputera', bertujuan memastikan golongan itu bukan sekadar menjadi peserta atau 'penumpang' dalam bahtera ekonomi negara, bahkan penggerak utama.

Kita yakin tiada gunung tinggi tak dapat didaki, tiada lurah dalam tak dapat dituruni tetapi dengan syarat tiga tonggak utama melaksanakannya dengan komited, integriti dan tegas. Pertama, penjawat awam, pegawai, agensi dan institusi kerajaan paling kritikal dalam memastikan kejayaan PuTERA35. Justeru, kita mengingatkan mereka memegang amanat Perdana Menteri supaya tidak ada pihak merosakkan atau menyalahgunakan agensi bertanggungjawab menguruskan agenda Bumiputera.

Kita meminta kerajaan dengan menteri, ketua setiausaha (KSU) dan pengurusan tertinggi kementerian serta agensi memastikan semua terbabit melaksanakan tugas penuh tanggungjawab dan cekap tanpa kompromi terhadap integriti. Pemantauan ketat terutama Suruhanjaya Pencegahan Rasuah Malaysia (SPRM) dan Jabatan Audit Negara (JAN) serta mekanisme semak danimbang Parlimen dan media diperlukan untuk mengelakkan penyelewengan, ke-tirisan dan pembaziran berulang, sekali gus memastikan setiap ringgit dibelanjakan memberikan impak optimum.

Kedua, pengusaha Bumiputera terutama perusahaan mikro, kecil dan sederhana (PMKS) mesti melihat PuTERA35 sebagai peluang keemasan meningkatkan daya saing dan skala perniagaan. Inisiatif dan insentif kerajaan semata-mata tidak cukup, sebaliknya pengusaha perlu proaktif mencari jalan mencipta nilai tambah dan meneroka pasaran baharu, terutama dalam sektor berpotensi pertumbuhan dan bernilai tinggi. Kita mahu PuTERA35 dilihat titik permulaan melonjakkan PMKS Bumiputera ke peringkat global.

Akhir sekali, ahli korporat Bumiputera berjaya perlu berperanan lebih besar membantu rakan seperjuangan mencapai kejayaan. Kita tidak mahu lagi melihat kerajaan 'mencurahkan' pelbagai bantuan sehingga mereka menjadi bilionair dan jutawan tersenarai dalam indeks kekayaan dunia tetapi hanya membawa berapa kerat saudara-mara serta 'kroni', sedangkan usahawan lain terkontang-kanting dan berhempas pulas untuk menghidupkan perniagaan yang ada kala hidup segan mati tak mahu.

Kita mahu golongan berjaya mengambil inisiatif membimbing serta membina rangkaian perniagaan dengan pengusaha sedia ada, sekali gus mengubah sifat individualistik kepada kolektif dengan kejayaan dikongsi demi kebaikan secara keseluruhan. Kerajaan perlu memastikan kegagalan dalam Dasar Ekonomi Baru (DEB), Dasar Pembangunan Nasional (DPN) dan semua polisi sosioekonomi sebelum ini tidak berulang dalam PuTERA35.

PuTERA35 perlu dijadikan formula wajib dijayakan semua pemegang taruh kerana pemulihan ekonomi negara dan kebangkitan kuasa 'Harimau Asia' tidak akan dapat berlaku kecuali golongan Bumiputera perlu 'rentak se-degam, langkah sepijak' merealisasikannya. Kejayaan Bumiputera yang kita mahu saksikan juga mesti ditandai dengan kaum itu mencapai penyertaan, pemilikan dan penguasaan dalam iktisad negara.